

Na un manera hopi tradicional

Minister Michelle Hooyboer-Winklaar a bautisa revista pa mucha Kiniki



ORANJESTAD (AAN): Diaranson atardi Minister di Enseñansa, Michelle Hooyboer-Winklaar a ricibi Addonsito Croes hunto cu Omar Harms na su oficinan pa e entrega oficial di e revista Kiniki. E revista nobo pa nos muchanan desde siman pasa ta den circulacion na scol y tambe na diferente boekhandel.

“Mi tin admiracion hopi grandi pa gruponan di hoben manera Addonsito y Omar y ful e team cu a traha lunanan largo pa hinca e revista aki den otro. E ta unicamente muestra cuanto talento tin den nos comunidad y cu nan ta inverti nan tempo y energia pa traha algo educativo pa nos muchanan di basis school,” Minister Hooyboer Winklaar a expresa.

Den e tur edicion di e revista e mandatario tin un seccion caminda muchanan tin e chens di sea pinta of haci weganan cu lo juda nan compronde e mensahe special cu e mandatario ta comparti den cada edicion. E muchanan cu participa na e weganan aki lo haya e chens pa gana un bishita na e oficina di Minister Hooyboer-Winklaar, unda cu e mandatario lo comparti un momento cu e ganador y entrega na dje diferente premio educativo.

Inspira y motiva pa

su recuerdonan leuk di tempo cu e tabata mucha, Addonsito Croes, kende awendia ta maestro na Filomena College MAVO, kier a rebiba e concepto di un revista pa muchanan di scol basico. Matinette, cual tabata un produccion di sra. Imelda de Cuba, tabata Meneer Croes su revista preferi. E ta conta cu tur luna e y su rumannan tabata purba di gana diferente premio cu tabata wordo ofreci den e revista; nan tabata pinta kleurplaat y pintura, haciendo nan best pa gana diferente premio.

Un biaha Croes a gana un cadeaubon di 25 florin pa bay come hamburger na un luga famoso na Aruba y esey te cu awe e ta corda como un experiencia hopi leuk.

Bek na Aruba despues di caba su estudio, Addonsito Croes sinti falta di un produccion manera revista Matinette y tambe di e programa di television na TeleAruba cual tabata tin e mesun number. Chabelito ta otro revista cu tambe el a yega di tende di dje, pero tambe no ta wordo publica mas. E “drive” di Croes pa kier comparti e

cosnan cu a contribui na un hubentud bunita tempo cu e tabata mucha a conduci na 2013 na e reintroduccion di e festival di canto Voz-I-Landia Escolar, cual a haya un acogida entusiasmo inigualabel. Asina tambe el a yega na e idea pa bin cu un revista pa mucha. Papiando tocante e tema aki cu e director adhunto di su scol, sr. Goedge drag a bis’e cu e tin e number perfecto pa su revista, esta Kiniki.

Su determinacion y esfuersonan a haya sosten di tur banda, incluyendo di parti di Ministerio di Enseñansa, cu ta resorta bao di Minister Michelle Hooyboer-Winklaar, kende ta un gran promotor di

lesamento y tur accion cu ta contribui na bienestar di e desaroyo positivo di nos muchanan y hobennan.

Kiniki a conoce su prome edicion e siman aki y como un muestra di aprecio special, Addonsito Croes a presenta e “prome revista” na Minister Michelle Hooyboer-Winklaar diaranson.

“Nos ta bay skirbi historia cune,” Addonsito Croes a expresa, referiendo na revista Kiniki, gradiciendo tur colaborador y tur cu a brinda apoyona realisacion di e revista pa mucha cu awo ta ofreciendo su prome edicion, como tambe e oportunidad pa muchanan abona riba e revista y no perde ni un publicacion.